

Vischnaunca da Sumvitg

**Ordinaziun
provediment d'aua**

C u n t e g n

Art. 1	Dretg surordinau	3
Art. 2	Corporaziuns	3
Art. 3	Specialas incumbensas dallas corporaziuns	3
Art. 4	Damonda da colligiazion e taxaziun	3
Art. 5	Survigilader	3
Art. 6	Controllas	4
Art. 7	Manteniment	4
Art. 8	Finanzas	5
Art. 9	Cumpart privata vid lingias d'aua	5
Art. 10	Apparatura AQUAPHON E4	5
Art. 11	Vigur	6

Sebasond sil reglament per il provediment d'aua relai la suprastonza communal la suandonta ordinaziun.

Art. 1 Dretg surordinau

Las prescripciuns dil reglament per il provediment d'aua ston vegnir risguardadas.

Art. 2 Corporaziuns

Las corporaziuns d'aua Sumvitg/S. Benedetg, Rabiun, Surrein/Val, Cumpadials/Clavadi e Laus ston relaschar statuts che reglan l'organisaziun, las cumpetenzas, ils pensums e la responsabladad sco era las finanzas dalla corporaziun. Ultra dils statuts san ellas era relaschar specialas ordinaziuns, carnets da pensums ni manuals per lur funcziunaris. Nua che la corporaziun regla nuot valan las determinaziuns dil reglament pil provediment d'aua dalla vischnaunca. Determinaziuns da status che cunterdian al reglament pil provediment d'aua dalla vischnaunca ein buca valeivlas.

Art. 3 Specialas incumbensas dallas corporaziuns

¹ Mintga corporaziun ei responsabla per il menaschi, la survigilonza sco era il manteniment da tut ils indrezs e stabiliments sco era dallas lingias principalas dil provediment d'aua sin siu intschess.

² Damondas per la construcziun d'implonts novs resp. per la sanaziun d'implonts existents ston vegnir inoltradas en scret alla suprastonza communal entochen ils 31 d'uost. La suprastonza decida sur dalla damonda e lai eruir ils cuosts da construcziun per il preventiv.

³ La corporaziun dat sin giavisch al gerau responsabel ni alla cumissiun da baghegiar sclariment sur dil provediment d'aua che vegn survigilaus dad ella.

Art. 4 Damonda da colligiaziun e taxaziun

¹ Las damondas per la colligiaziun cun il conduct d'aua ston vegnir inoltradas ensemen cun la damonda da baghegiar e sil formular corrispudent.

² La cumissiun da baghegiar consultescha la corporaziun corrispudenta, la quala examinescha la damonda e fa eventualas prescripciuns specialas. La lubientscha vegn dada entras la cumissiun da baghegiar.

³ La cumissiun da baghegiar calculescha la taxa da colligiaziun provisorica tenor il reglament pil provediment d'aua.

⁴ La taxa definitiva vegn calculada dall'administraziun communal aschigleiti ch'il schazetg ufficial ei avon maun.

Art. 5 Survigilader

¹ Mintga corporaziun elegia in ni plirs survigiladers per ils indrezs dil provediment d'aua dalla corporaziun.

² La corporaziun fixescha ils pensums dil survigilader enteifer ses statuts.

³ L'indemnisaziun dil survigilader ei caussa dalla corporaziun.

Art. 6 Controllas

¹ Ils suandonts indrezs ston periodicamein vegnir controllai entras la corporaziun sin lur funcziun:

- tschaffadas d'aua, combras d'aua, reservuars	4 x ad onn
- tumbins da repartiziun, staziuns da reducziun dalla pressiu	4 x ad onn
- scludiders	1 x ad onn
- indrezs da stizzar fiug	1 x il meins
- hidrants	1 x ad onn
- begls e fontaunas publicas	2 x ad onn
- conducts d'aua publics e privats	tenor basegns

² Las controllas succedan tenor in formular da controlla che vegn surdaus allas corporaziuns entras la suprastonza communal. Igl original dil formular da controlla vegn mintgamai surdaus alla suprastonza communal cun la fin digl onn calendar.

³ Mintga 2 onns sto la qualitat dall'aua vegnir controllada entras il labor cantunal. L'emprova da qualitat duei dar sclariment sur dalla microbiologia e sur dalla chemia dall'aua. Ils cuosts da quellas emprovas surpren la corporaziun. La vischnaunca survegn mintgamai in dubel dil rapport da labor.

Art. 7 Manteniment

¹ La corporaziun ei responsabla per il manteniment da tut ils indrezs dil provediment d'aua public.

² La corporaziun metta a disposiziun tut il material e tut ils uaffens necessaris per quella lavur.

³ Lavurs da manteniment ein:

- mantener ev. classenas entuorn las tschaffadas,
- schubergiar combras d'aua e reservuars,
- tener liber indrezs sutterans da caglias (en special badugna)
- tener liber passadis d'access,
- frestgentar la colur nua che quei fa basegns,
- unscher tenor basegns,
- reparaturas pintgas vid baghetgs ed indrezs che san vegnir executadas entras il survigilader e caschunan cuosts entochen frs. 200.--,
- reparaturas pintgas vid lingias, p.ex. novas gummas da stuppadira, trer en colligiazions che piardan, e.a.v. senza midar ora il material principal (bischels, tocca speciala, scludiders e.a.v.).

⁴ En cass da manteniment munclus dils indrezs dil provediment d'aua sto la corporaziun surpender persula las investiziuns extraordinarias che seresultan ordlunder.

⁵ Tier defects vid indrezs che pretendan ev. renovaziuns pli grondas sto vegnir informau il gerau responsabel avon ch'entscheiver cun las lavurs. Tier deffects vid ils indrezs da stizzar fiug ston medemamein il cumandant da pumpiers communal ed il cumandant da fracziun vegnir informai.

⁶ Tuts hidrants ston vegnir numerai. Duront igl unviern ston tuts hidrants vegnir marcai entras ina petga da lenn colurada blau e bein veseivla. La neiv entuorn ils hidrants sto vegnir dismessa.

Art. 8 Finanzas

¹ La corporaziun ei responsabla per sias finanzas.

² La cumpart dallas taxas da colligiazion ei reservada per la finanziaziun d'engrondaziuns e renovaziuns dil provediment d'aua e sto era vegnir mussada ora el quen dalla corporaziun. Renovaziuns dil provediment d'aua cumpeglian tuttas lavurs che pretendan niev material sco bischels, tocca speciala, scludiders e.a.v..

³ Cun las taxas da diever tenor art. 25 dil reglament pil provediment d'aua finanziescha la corporaziun ses cuosts currents sco era il manteniment dil provediment d'aua tenor art. 7 La corporaziun fixescha las taxas da diever, denton buca la fuorma da calculaziun da quellas.

Art. 9 Cumpart privata vid lingias d'aua

¹ Vegn colligiau ina lingia privata vid il conduct public (ni principal) existent sto il privat surpender tut ils cuosts.

² Vegn ina lingia privata construida el medem mument sco il conduct public (ni principal) sto il privat surpender ils cuosts digl element T sco era dil scludider. Ina eventuala lavur per tagliar il bischel croda medemamein al privat.

Art. 10 Apparatura AQUAPHON E4

¹ L'apparatura AQUAPHON E4 ei in instrument per encurir lingias d'aua. In'apparatura supplementara lubescha era d'encurir lingias da canalisaziun.

² L'apparatura per encurir lingias d'aua ei proprietad comunabla dalla vischnaunca e dallas corporaziuns d'aua Sumvitg/S. Benedetg, Rabiun, Surrein/Val, Cumpadials/Clavadi e Laus.

³ L'apparatura supplementara per encurir lingias da canalisaziun appartegn alla vischnaunca.

⁴ L'apparatura AQUAPHON ei deponida gratuitamein ella stanza da repartiziun dalla corporaziun d'aua e glisch Rabiun. Mintga corporaziun cumpigliada ha ina clav per quella

stanza ed ei responsabla per quella. Vegn ina clav piarsa sto quei vegnir annunziau immediat alla corporaziun d'aua e glisch Rabiuis.

⁵ L'apparatura astga vegnir duvrada mo sin intschess dalla vischnaunca da Sumvitg. Ella astga vegnir duvrada mo da persunas cumpetentas ed autorisadas dallas corporaziuns resp. dalla vischnaunca.

⁶ Tier donns vid l'apparatura sto immediat vegnir informau la corporaziun d'aua e glisch Rabiuis che ei responsabla per il manteniment ed ev. reparaturas da quella.

⁷ Tut tgi che fa diever dall'apparatura sto impurtar quei ella carta da controlla. Las indicaziuns en quella carta muossan il diever dall'apparatura e lubeschan il scuntrar quen cun ils utilisaders.

⁸ Donns pli gronds dils quals il caschunader sa buca vegnir eruius vegnan finanziari cun la medema repartiziun denter vischnaunca e corporaziuns sco tier ils cuosts da cumpra.

⁹ Per diever dall'apparatura vegn incassau las suandontas taxas:

- tochen 1 ura frs. 30.--
- per mintga ura supplementara frs. 10.--

¹⁰ Las taxas incassadas astgan vegnir duvradas mo per il manteniment dall'apparatura resp. per la cumpra d'in'apparatura nova ni da parts da quella.

¹¹ La corporaziun nua che l'apparatura vegn duvrada incassescha las taxas dils utilisaders. La corporaziun d'aua e glisch Rabiuis scuntrescha quen cun las autras corporaziuns resp. cun ils utilisaders privats alla fin digl onn e meina in conto special per l'apparatura.

¹² Alla fin digl onn calendar presenta la corporaziun d'aua e glisch Rabiuis il rendaquen dall'apparatura allas corporaziuns cumpigliadas sco era alla vischnaunca.

Art. 11 Vigur


Questa ordinaziun ei vegnida approbada dalla suprastanza communal ella seduta dils 06-12-1999 e passa en vigur culs 01-01-2000.

Il president communal:



Placi Michèl Wenzin

Igl actuar communal:



Martin Monn